

職方典第五百七十卷

臨洮府部彙考四

臨洮府古蹟考二

墳墓附

通志府縣志合載

本府

狄道縣附郭

秦扶蘇墓在城北二十五里名扶蘇巖下有大塚二父老相傳謂秦扶蘇太子之墓

蒙恬

墓卽在二大塚之下傳謂卽恬墓

唐西平忠武王李晟墓在郡西二十里西平蘭家灣晟

狄道人西安府高陵縣亦有墓未知孰是明萬曆三十一年京山李維標至洮以西平乃其遠祖遂訪故蹟於田家得一石刻上五言律一首宋知熙州宋京所作也題曰謁西平祠詳此則高陵縣爲西平墓而此爲西平祠也或又言此晟父母之墓悞矣

金總管陀滿胡土門墓

在城北

元大司徒祁安墓在城北葉家坪

明禮部員外郎許允德墓在城東五里允

德長安人洪武初奉詔往諭朶甘烏思藏復奉命安撫西寧諸處番民歸至臨洮病卒遂葬於此

府學教授前太常寺少卿劉杰墓在城北董家坪杰梁山人洪武末以議禮忤旨左遷

後卒遂葬於此

會川伯趙安墓在城東闔家嶺

渭原縣無考

蘭州

隋薛舉墓在城西四里古峯之後舉大業末據蘭

明肅莊王墓在城東北六十里平頂峯

王係宗室永樂十七年葬此

康王墓

簡王墓

恭王墓

靖王墓

定王墓

昭王墓

懷王墓

懿王墓以上俱在平頂峯

定王墓在古峯山之後

憲王墓

在城西南二十里周家山

薛太夫人墓在平頂峯夫人莊王配永國桓襄公薛賢之女

彭少保墓在城西五里唐帽山下後裔消乏傾圯殆盡內有先朝誥封碑記舉朝文武祭文碑

記士民曾公請蠲恤墓賦未果

黃編修墓在龍尾山

金縣無考

河州

後周刺史開國公石靖墓在州北靖都督河州卒葬廣大原卽今北原上

明劉都督墓全

椒人永樂五年鎮守河州卽名宦劉釗也葬城南十五里川中石獸神道碑尙存 王尙書

莊毅公墓在城北萬頃原麓嘉靖壬辰詔重修編夫看守 朱御史墓在城東二里有碑

馬按察應麟墓在城西二里有碑

臨洮府部藝文一

窮河源記

元潘昂霄

延祐乙卯春聖天子以四海萬國之廣軫念庶民艱虞罔控告也分使詣外諸道布揚德心休戚興替之清濁激揚之幾旬密邇獨不得均其澤越五月詔前翰林學士承旨臣闊闊出翰林學士臣昂霄奉使宣撫京畿西道臣昂霄承命驚悸罔措惟務罄忠赤恤民瘼而後已闕公一日語昂霄曰余嘗從兄榮祿公都實抵西國窮河源霄不覺瞿然以駭曰有是乎哉請畢其語公曰世祖至元十七年歲在庚辰欽承聖諭曰黃河之入中國夏后氏導之知自積石矣漢唐未能悉其源今爲吾地朕欲窮其源之所出營一城俾番賈互市規置航傳凡物貢水行達京師古無有也朕爲之以永後來無窮利益蓋難其人都實汝舊人且習諸國語汝往圖授招討使佩金虎符以行是歲四月至河州

東六十里有寧河驛西南六十里山曰沙馬關林麓窮隘譯言泰石答班啟足浸高一日程至嶺西
逾高四五千里始抵河源冬還圖城傳置以聞上悅往營之授土番等處都元帥仍金虎符置寮案
督工師悉資內地造航爲艘六十城傳措工物完闕闢出驛適聞相哥征岷藏不廻力阻遂止翌歲
兄都實旋都言曰河源在吐蕃朶甘思西鄙有泉百餘泓或潦水沮洳散渙方可七八十里且泥溺
不勝人迹近觀弗克傍履高山下視燦若日星以故名火燉腦兒譯言星宿海也群流奔湍近五七
里匯二巨澤名阿刺腦兒自西徂東連屬吞噬廣輪馬行一日程迤邐東驚成川號赤賓河二三日
程水西南來名亦里木合赤賓三四日程南來名葱蘭又水東南來名里也木合流入赤賓其流浸
大始名黃河然水清人可涉又一二日岐裂八九股名也孫幹譯言九渡通廣六七里馬亦可渡又
四五程水渾濁土人抱革囊乘馬過之民聚部落糾集木幹象舟傳毛革以濟僅容兩人繼是兩山
岐束廣可一二里或半里深莫測矣朶甘思東北鄙有大雪山名亦耳麻不莫刺其山最高譯言騰
乞里塔卽岷崙也山腹至頂皆雪冬夏不消土人言達年成冰六月見之自八九股水至崑崙行二
十六日程河行崑崙南半日程既又四五程至地名闕卽及闕提二地相屬又三日地名哈刺別里

赤兒四達之衝也多寇盜有官兵鎮守崑崙迤西人簡少多處山南山皆不穹峻水亦散漫獸有犂牛野馬狼豹羝羊之類其東山益高地亦漸下岸狹隘有狐可一躍之者行五六日程有水西南來名納鄰哈刺譯言細黃河也又兩日程水南來名乞兒馬出二水合流入河河北行轉西至崑崙北二日程地水過之北流少東又北流入河半月程至歸德州地名必赤里始有州事官府州隸河州置司吐蕃等處宣慰所轄又四五程至積石州卽禹貢積石五日至河州安鄉關一日程至打羅坑東北行一日程洮河水南來入河又一日程至蘭州其下過北卜渡至鳴沙州過應吉里正東行至寧夏府東南行卽東勝州隸西京大同路地面自發源至漢地南北澗溪細流旁貫莫知紀極山皆草山石山至積石方林木暢茂世言河九折彼地有二折蓋乞兒馬出及歸德州必赤里也漢張騫使絕域拘執艱厄歷大宛月氏等數國其旁大國五六皆稱傳聞以爲窮河源烏能觀所謂河源哉史稱河兩源一出于闐一出葱嶺于闐水北行出葱嶺合注蒲類海不流伏至臨洮出焉今洮水自南來非蒲類明矣詢之士人言于闐葱嶺水其下流散之沙磧又有言河與天河通尋得織女支機石以歸亦妄也崑崙去嵩山高五萬里闐風元圃積瑤華蓋仙人所居又何妄耶唐史吐蕃傳河上

流由河洪濟梁南二十里水益狹春可涉秋夏乃勝舟其南三百里山中高而四下曰紫山古所謂
崐崙其言頗類然止稱河源其間云國家仗天威互天所覆幬無間海內外冠帶萬國罔非臣妾視
漢唐爲不足訝故窮源去萬里若步闌闌噫盛典也可不因志之都實族女貞蒲察氏統烏思藏路
暨招討都元帥凡三至吐蕃闌闌出今除甘肅省叅知政事是歲八月初吉元翰林侍讀學士知制
誥同修國史潘昂霄記

黃河賦

明黃諫

噫嘻浩浩乎廓矣哉黃河之水邈兮吾不知所從來填兮若萬騎之赴敵倏兮若起蟄之雷奮迅而
疾馳無荒子常登高而望焉夕晡隱隱望窮遠目日淪於此是謂蒙谷殆非是水之所出乎而咏者
謂自天而來其必有所得乎無荒子方仰而觀俯而思蓋不得所由適增吾心之煩懊傍有一老僂
僂而前呀然而嘆曰子非博望而所望何與方其使月氏留匈奴漢節不失而志以舒此非丈夫得
意之時乎夫何亡走大宛歷康居絲大夏抵西都盛言汗血之駒叩竹之杖與身毒之蜀布接踵乎
唐蒙之枸醬啟天子拓達之心貪得之病務廣地於萬里九譯而歸向期德威過於四海殊俗於化

域迺用皇皇使臣數道並出鷲出荅出叩出懣甘心事西南之彝所欲者不過通大夏之國博望於是而得矣志滿意適豈知獨夫罹困死於暑濕者哉而乃詭托靈槎載名汗青嘗窮河源惡曾覩夫崑崙浪博牛女之石而汚乎君平雖誑當時豈知貽議後代孰若神禹之功萬世永賴奚不此是思徒用心於遠大斯非君子之當戒也夫子其母以爲喋喋而誌予陳其槩焉夫水地之血脉絡也而水莫過江河之洪江則極乎中國自天地之西而極乎天地之東者莫黃河之與同憶在宣德中予嘗奉使節抵番戎出萬里越窮荒乘四驪以如迅曾崑丘之是登蓋知河源之有三一出天竺葱嶺一出于闐南山二派乃合流而趨東崑崙所發之正源越葛蒲而益宏去玉關之非遐其流潛行乎地中南去積石始經鄯鄯之邦也踰赤賓而益遠水遂濁而不澄過抱罕而趨金城適洮漓湟水之斯從雖有九曲百折之異而其勢咸若諸侯之朝宗此予之所身履而目經營究夫神禹穿山鑿地之功也當夫浩浩蕩蕩九州一壑天地不得其平成而民焉事乎耕鑿微禹之功生民奚免乎魚鼈惟積石之在中國故疏導之首及凡值壅遏則爲之濬滌上流用功尙易至若下流用功尤密由乎手胼足胝於九載故能成萬世之利於陷溺之極是以水得以順其性人得以安其居蓋吾鄉之一

區亦禹功之是修鑿亂山之吸磯使直下以奔流廣可數里狹容一舟惟順流以東趨則害由此除
耕者可施其功漁者得其所資沮河伯之自喜補造化之或虧茲功之大非禹而誰雖通大宛大夏
安息而續有愈於斯乎故吾與子同全乎眇質以濡涵乎光天化日況子以文學得幸禁密茲以事
歸獲接乎辭色奚假予之陋識而斯河之所從來以釋哉特以發子之志舒子之才無荒子乃謝曰
異哉吾生於茲長於茲多學博文爲衆所推胡屢中之賜見忤於抱甕濯畦旣而幡然改曰義理不
窮所知罔廓乃知邇言可察芻蕘可擇況子之言誠務所當急苟徒遠大是望而不思拯天下之溺
雖學聖賢夫又何益老翁大笑予亦躍躍乃與長揖而別吾將冀此一清獻頌於九重之闕

臨洮府部藝文二 詩

哥舒大夫破洪濟城登積石軍七級浮圖

唐高適

塞口連濁河轅門對山寺
寧知鞍馬上獨有登臨事
七級凌太清千崖列蒼翠
飄飄方寓目想像見深意
高興殊未平臨風翮然至
拔城陣雲合轉旆旄星墜
大將何英靈官軍動天地
君懷生羽翼本欲厚騏驥
歎乃苦不前青冥信難致
一歌陽春後三嘆終自愧

金城感舊

宋胡宿

千里青雲未致身，馬蹄空踏幾年塵。
曾迷玉洞花光老，欲過金城柳眼新。
粉壁已沉題鳳字，酒壚猶記姓黃人。
塢中橫笛偏多感，一涕闌干白角巾。

送董元達之金城

謝無逸

讀書不作儒生酸，躍馬西入金城關。
塞垣苦寒風氣惡，歸來面皺鬚眉班。
先皇召見延和殿，議論慷慨天開顏。
謗書盈篋不復辨，脫身來看江南山。
長江滾滾蛟龍怒，孤舟此去何當還。
大梁城裏定相見，玉川破屋應數間。

臨洮院後半壁古城歌

明趙貞吉

君不見秦城萬里如遊龍，首接洮河尾遼海。
三堵龍頭勢隱嶙，至今不共山河改。
何時山外起新陣，圍繞古城當戶楣。
相逢若識桃源叟，應憶當時征戍兒。

臨洮院後校射亭放歌行

前人

東風吹泉作酒香，洮水射河河水黃。
落日正掛崑崙旁，手彎勁羽欺垂楊。
借君廡上三飛驎，葱海蹴

踏葡萄漿黃鵠高高摩青蒼彈來一曲堪斷腸有女肯嫁烏孫王

五泉

黃諫

水遶禪林左右連蕭蕭古木帶寒烟共誇城外新蘭若自是人間小洞天僧住上方如罨畫雨餘下土應豐年明朝再擬同遊賞竹裏行廚引澗泉

華林寺

前人

縹緲蓮花紫翠重眼前風景望難窮疎鐘聲送蒼煙外古鼎香飄寶殿中雲暗高松藏宿鳥雨餘澗底飲長虹詩人心地清如水吟罷涼颿月滿空

松山曠徒解散回中土感賦

前人

中原有芳樹日暮葉疎稀風雨又飄落根株苦無依可憐熒熒鳥忍與舊枝違棲遲偃雙羽那知身是非日久思故林哀哀鳴且飛沙場棲靡定搖搖將欲歸鴻鴈旋中澤安得稻梁肥暖汀育鷗鳥飲啄自忘機

陪孫月岩道長登超然臺次韻

宋賢

瞻瞻金玉姿宛在洮水東溯洄期相從烟波渺長空日來造詣別業廣德益崇緬惟嶽麓遊蘭芳摛
葵莢靈籟發幽響冰絃韻松風當歌薦羽觴酒映花光紅臺榭俯碧落複道青雲通飛蓋山林阿凌
險驅雙驄睽竝几席親如在春風中相看逆旅孤裘共蒙茸日落故堯墟樹暗吳王宮睇盼不可
及倚劍吟崆峒

春日五泉

丁晉

池上春晴物色饒溶溶水漲欲平橋鶯啼谷口林花媚魚躍波心水荇搖濁酒不辭千日醉閒心何
必小山招盤桓已久且歸去明日來尋杜若苗

春登臯蘭山

前人

獨步層巔四望遙天風吹我上金鰲河流曲折虹梁闊山勢參差甲第高萬里梯航朝北闕一川花
柳漲東臯歸來暫憩衡茅下笑指鄰翁問濁醪

馬銜風雪

前人

風捲瑤花苦作寒皚皚深覆馬銜山溪流鳴咽空聞響石磴嶙峋不可攀短策尋梅何處得孤舟載

鶴幾時還皋蘭在望無多遠樓閣參差杳靄間

蘭山烟雨

顏鳳姿

一派銀潢天際來曲欄映渚此登臺鳳林北折關山樹龍尾西迤水一隈絕巘浮圖三級雪排川巨浪百聲雷臨流記取前朝事漢使星槎幾次回

五泉飛瀑

陳遇主

曾似當年浴佛城九龍領下響崢嶸瀉來絕壁千行玉散作靈岩一片晶潏向池前環鏡合滴穿石上亂珂鳴梵天鎮日花成雨空翠侵衣暑不生

臨洮府部紀事

府志秦始皇二十三年蒙恬收河南地築長城帝北巡遣蒙恬發兵三十萬伐匈奴收河南地爲四十四縣築長城起臨洮止遼東延袤萬餘里威振匈奴 二十八年帝使長子扶蘇監蒙恬軍

按古

蹟有塚在郡北三十里扶蘇崖相傳即扶蘇墓

三十六年有十二人各長五丈足履六尺皆異服見於臨洮始皇以爲

瑞收天下金鑄爲金人十二像各重二十石置立於宮中

漢景帝三年研種求隴西塞徙狄道

武帝元狩三年以霍去病爲驃騎將軍將萬騎出隴西討匈奴嘗合短兵鏖戰皋蘭山下是歲秋大破匈奴

宣帝神爵元年先零羌楊玉叛夏四月遣後將軍趙充國擊之時趙充國年七十餘上老之使丙吉問誰可將者充國對曰無踰於老臣者矣上問度當用幾人充國曰百聞不如一見兵難遙度願至金城圖上方略秋七月充國引兵擊叛羌叛羌多降詔復遣將軍辛武賢等將兵擊之尋詔罷兵留充國屯田湟中二年夏五月充國振旅而還先是奏言羌本可五萬人除斬降溺饑死定計遺脫不過四千人羌靡忘等自詭必得請罷屯田奏可充國乃還秋羌若零離留且種兒庫共斬先零大豪猶非楊玉首及諸豪弟澤陽雕良靡忘皆率煎鞏黃羝之屬四千餘人降封若零弟澤爲帥衆王離留且種暨陽雕爲侯兒庫良兒靡忘爲君初置金城國以處降羌

元帝永光二年秋七月隴西羌三姐旁種反遣右將軍馮奉世將兵擊之冬十一月羌大破上以隴西羌反詔丞相元成等入議是時歲比不登朝廷以爲憂右將軍馮奉世上言願將兵擊之於是遣

奉世到隴西且上地形部衆多少之計願益兵上爲發六萬餘人十一月大破羌戎斬首數千級皆走出塞詔罷吏士頗留屯田備要處賜奉世爵關內侯

更始元年成紀隗囂起兵應漢時隴西金城諸郡皆下之夏五月以庫鈞爲金城太守

後漢光武建武元年羌寇金城以牛邯爲護羌校尉更始赤眉之際羌遂縱寇司徒掾班彪上言降羌數爲小吏黠人侵奪故致反亂舊制置護羌校尉理之宜復如舊光武從之 十年先零羌寇

金城來款擊破之斬首數千級於是開倉賑之隴右遂安 十一年先零種寇臨洮隴右太守馬

援大敗降之後徙置天水隴西扶風三郡自燒當至滇良世居河北大允谷後徙大小榆中由是始強 十三年叅狼羌寇武都馬援破之時降者萬人隴右清靜援寬以待下職總大體而賓客故

人日滿其門旁縣常有報讎者吏民警言羌反百姓奔入城狄道長詣門請閉城發兵援時與客飲大笑曰羌何敢復犯我曉狄道長歸守寺舍良怖急者可牀下伏後稍定郡中服之秋周鮪與金城太守侯霸擊迷唐於允川 十四年置東西邯屯田五部金城長史上官鴻開置歸義建威屯田

二十七部侯霸復上請置東西邯屯田五部帝皆從之

中元二年燒當羌滇吾滇岸反率眾寇隴西敗太守劉盱於允街

按允街金城屬縣

章帝建初二年金城隴西保塞羌皆反拜馬防行車騎將軍事以長水校尉耿恭副將北軍五校兵及諸郡積射士三萬人擊之軍到冀而羌豪布橋等圍南部都尉於臨洮防欲救之臨洮道險車騎不得方駕防乃別使兩司馬將數百騎分爲前後軍去臨洮十餘里爲大營多樹幡幟揚言大兵旦當進羌候見之馳還言漢兵盛不可當明日遂鼓譟而前羌虜驚走因追擊破之斬首虜四千餘人遂解臨洮圍

三年燒當羌迷吾與封養種寇隴西漢陽遣將軍馬防校尉耿恭擊大破之

章和元年護羌校尉傅育擊羌敗死時護羌校尉張紆擊羌斬其帥迷吾其子迷唐據大小榆谷叛二年以鄧訓爲護羌校尉擊迷唐破之

和帝永元九年迷唐寇隴西殺大夏遣將軍劉尚討破之

十二年以侯霸爲金城郡太守秋七

月迷唐請降

十三年秋迷唐寇金城郡兵擊破之迷唐復還賜支河曲將兵向塞金城太守侯

霸擊破唐種人瓦解迷唐遂弱

十四年以曹鳳爲榆廩相時安定降羌燒河種反郡兵擊滅之

自是大小榆谷左右無復羌患

順帝永建元年隴西鍾羌反馬賢擊破之戰於臨洮斬千餘級 二年馬賢擊破當煎種於金城

順帝永和二年金城隴西地震裂城郭屋宇多壓殺人 三年春三月金城隴西山崩冬十月燒

當羌那離寇金城校尉馬賢擊破之

通志桓帝元嘉二年黃龍見允街

府志桓帝延熹二年以段熲遷護羌校尉會燒當等八種羌寇隴西金城塞將兵萬二千騎出湟谷擊破之斬其酋豪以下二千級獲生口萬餘人羌皆降走

通志靈帝光和六年河溢東出二十里

府志獻帝建安十九年枹罕宋建反自號平漢王討斬之諸羌皆降

後帝延熙十年以姜維遷衛將軍出隴西南安金城界與魏將郭淮夏侯霸等戰於洮西無戴等舉部落降 十六年夏四月姜維伐魏圍狄道 十七年維復出隴西狄道長李簡舉城降

十八年八月姜維伐魏敗其兵於洮西遂圍狄道不克而還先是維復議出軍征西大將軍張翼廷爭不可維不聽遂將數萬人至枹罕魏雍州刺史王經與戰於洮西大敗死者萬計還保狄道維怒